

## **Makitibi ki Pol ndangi adi Titi**

*Ta ki do makitibi ti ki Pol ndangi adi Titi*

Titi ki Pol ndangi makitibi ade kin e Jipi (Gal 2.1-3). Titi e ki kare dan madi-kilə Pol je ti. E e ə ilə rone nangi ra adi Pol əi ki njé kaw-naa je ki Koreti ti təli iləi noji naa ti (2Kor 7.6-16). Pol ndangi makitibi kin adi Titi loki Titi e do dər ti ki Kirəti. Pol ade kilə kadi ində kəmne go njiyə maji ti lə njé kaw-naa je ki Kirəti ti (1.5).

Lo kilə ngirə ta ti, Pol əl Titi ne ki uwə mee ə ndangi-n makitibi kin ade (1.1-4). Go ti, əl-e ne je ki sɔbi kadi dəw oo rə njé kər nɔ njé kaw-naa je ti (1.5-16). Ta ki re go ti, Pol adi Titi ta kɔji ɔji-n do ɔuti dije je ki dangi dangi ki toi dan njé kaw-naa je ti, kadi ində kəmne gode ti. Adi e dingəm je ki tɔgi, ki dəne je ki tɔgi, ki ngan basa je, ki ngan mandi je ki sɔbi kadi dəne je ki tɔgi a indəi kəmde gode ti, ki ɔə je (2.1-15). Go ta kɔji ti, Pol ɔji Titi rəbi kilə lə njé kun go Kirisi ki sɔbi kadi ɔji-de adi rai, kadi isi ki naa ki lapiya ki kanji gangi-naa (3.1-11). Pol tɔl ta ta ləne ki ngan ndu je ki kadi ra ki Titi me kilə ti nim, ki ta kuwə ji-naa nim tɔ (3.12-15).

Ta ki to me makitibi ti ki Pol ndangi adi Titi kin, e ta ki un njé kaw-naa je pəti, ɔi e ta ki dokagilo ti lə Titi par əl. Ta do kində-naa do kilə ti ki goe goe do njé kaw-naa je ti, ə se kində kəm go njé kaw-naa je ti kadi njiyəi maji, ki ta ki do pa njiyə njé kər nɔ njé kaw-naa je ti, ki kilə ki sɔbi kadi njé kaw-naa je wa

rai kìn, e ta kì sòbì dɔ nǝ kaw-naa je pətì kì lo je tì kì dangì dangì.

### *Kuwə ji-naa*

<sup>1</sup> Mi Pol kì bəə kilə lə Luwə, mi kì nje kaw kilə lə Jəju Kìrisi ə m-ndangi makitibi kìn. Mi nje kaw kilə mba kadi dije kì Luwə mbəti-de adi mede. Taa kadi m-ɔji-de kadi gəri nɛ kì rɔjeti kì go ndu Luwə tì tɔ.

<sup>2</sup> Be mba kadi indəi mede dɔ kaji tì kì bitì kì nɔ tì, kì Luwə kì nje ngom al, un mindine adi-je dɔ tì kəte nɔ nɛ je tì pətì. <sup>3</sup> Luwə ɔji ta lə nɛ adi dije gəri kì takul kiyə kì iyə jim tì kadi m-ilə mbɛe dɔkagilo tì kì e wa ɔji. M-ilə mbɛe kì go ndigì tì lie e kì NJe kaji-je.

<sup>4</sup> M-ndangi makitibi kìn m-adi jì Titì<sup>☆</sup> kì jì ngonm kì rɔjeti. jì ngonm kì rɔjeti me kadi-me tì, kì je kare ba dɔ tì. Kadi me-maji kì kisi-maje lə Luwə kì Bawje əi kì Jəju Kìrisi kì NJe kaji-je e səi naa tì.

### *Kilə kì kadi Titì ra me 6e tì kì Kìrəti.*

<sup>5</sup> M-iyəi gogì dɔnangi tì kì Kìrəti mba kadi tə itɔl ta kilə je kì nay. Nìngə kadi ində ngatɔgi je dɔ nǝ kaw-naa je tì me 6e bo je tì kare kare pətì. Ində-de kì go kɔji tì kì ndɔ kì m-ɔjii. <sup>6</sup> Nìngə sòbì kadi dəw kì ngatɔgi e dəw kì ta goto dɔe tì, e ngaw dəne kì kare ba, kadi e dəw kì ngane je əi nǝ kadi-me je, kì kadi dəw ində ta dɔde tì ɔji dɔ hal kì majal ə se dɔ ngə al. <sup>7</sup> Sòbì kadi nje kər nɔ nǝ kaw-naa je e dəw kì ta goto dɔe tì, mbata e nje ngəm nɛ lə Luwə. Kadi e nje tɔ rɔ al, e nje wongì al, e gɔ kasi al, e nje rɔ al, taa kadi e nje ge nɛ kì go rəbi tì kì dana al, al tɔ. <sup>8</sup> Sòbì kadi e nje ra mba, kadi e nje ge nɛ ra kì maji, e nje kəl ta kì go rəbe tì, e dəw kì dana, e dəw kì ay njay,

☆ 1:4 2Kor 8.23; Gal 2.3; 2Tim 4.10

e nje kuwə rəne gin təgine ti. <sup>9</sup> Maji kadi uwə rəne ngame ta ti ki rəjeti, ki aw naa ti ki ne ndo ki ingə. Lo kin ti, a asi kadi ilə dingəm me ndəgi dije ti ki ne ndo ki rəjeti. Taa a asi kadi ɔji njé je ki isi ndoi ne je ki rangi kadi gəri təki ndəmi rəbi tə.

<sup>10</sup> Dije ngay dan \*Jipi je ti əi njé mbati təl rəde go ta ti ki rəjeti, isi tidəi ta je ki biriri, isi ədi dije ki ta ki ndae goto. <sup>11</sup> Adi uti tade də ta je ti ləde. MBata tui də dije me kəy je ti ngay ki ne ndo ki kadi dəw ndo al. Rai be mba kadi ingəi ne kingə ki go rəbe ti al ji dije ti. <sup>12</sup> Dəw kare dande ti, adi e nje kəl ta ki tade ti əi je wa ə nə: «Dije ki Kirəti ti əi njé kəl ta ki ngom ki ndə je pəti, əi da je ki mande majal, əi njé ra ta mede, ki njé dabi je.» <sup>13</sup> Ningə ta ki əl kin e ta ki rəjeti, ə maji kadi indangi-de ki rə tui, kadi əi njé kadi-me je ki rəjeti. <sup>14</sup> Bi kadi təli rəde go su je ki kidə ti lə Jipi je ki go ndu-kun ti lə dije ki njé mbati ta ki rəjeti kam al. <sup>15</sup> Ki rə dije ti ki ayi njay, ne je pəti ayi njay tə, nə ki rə dije ti ki ayi njay al, ki dije ki njé kadi mede al, ne ki ayi njay goto rəde ti. Ne ki ayi njay goto rəde ti, tadə ne gər ləde, ki mede ki kadi uwə-de ki ta tuji. <sup>16</sup> Dije kin, əli tade ti təki n-gəri Luwə, nə kilə rade naji ta gər-e. Əi njé ra ne ki to nje, əi njé tə rə je, asi kadi rai ne madi kare ki maji, al.

## 2

*Ta də dije ti ki təgi, ki ngan basa je ki mandije, ki bəə je*

<sup>1</sup> Ningə ki səbi dəi, maji kadi indo ne ki aw naa ti ki ne ndo ki rəjeti. <sup>2</sup> Əl baw dingəm je kadi əi dije ki njé kuwə rəde gin təgide ti, dije ki asi ta kəsi-gon,

dije ki njé ra ne ki go rabe ti, dije ki awi ki kadi-me ki toge to, kadi ai dije ki awi ki ndigi-naa mede ti, dije ki njé kore mede.

<sup>3</sup> Əl kə dəne je kae ti wa kin be tə. Əl-de kadi pa njiyəde e pa njiyə dije ki ayi njay, kadi ai njé kəl ta ki majal də dije ti al, taa kadi ai go kasi je al tə. Nینگə, kadi ai njé ndo ne ki maji. <sup>4</sup> Maji kadi ndoi dəne je ki du kadi ndigi ngawde je ki ngande je. <sup>5</sup> Kadi ai njé ra ne ki go rabe ti, ai njé ngəm rəde, ai njé kində kəmdə go me kəy je ti ləde maji, ai dije ki maji, ai njé kilə dəde gin ngawde je ti. Re rai be nینگə, dije a əli ta ki mal də ta ti lə Luwə al.

<sup>6</sup> Əl ngan basa je ki ngan mandi je tə, kadi awi ki hal ki maji me ne je ti pəti. <sup>7</sup> Nینگə j wa ki dəi, səbi kadi j ne ndaji me ne ra je ti ki maji mbata ti ləde. Kadi ne ndo ləi e ne ndo ki təgi gangi ki ndam goto me ti. <sup>8</sup> Kadi ta kəli e ta kəl ki ay njay, ki dəw asi kadi a əl yəne əsi-n kade al. Re ira be nینگə, njé kəsi-je ta a gəri ne ki kadi rai al, kadi awi ki ta ki majal kare kadi əli dəje ti al.

<sup>9</sup> Əl bəə je kadi iləi dəde gin təgi ti lə bade je me ne je ti pəti. Kadi bade je ingəi maji rəde ti. Kadi naji ta bade je ti al, <sup>10</sup> taa kadi bəgi-de al tə. Kadi nayi-naa ki lo ka dana ti ki asi-naa bərəre, kadi bade je adi-de mede. Be ə, me ne je ti pəti, a adi-de kəsi-gon də ne ndo ti lə Luwə ki nje kaji-je.

### *Me-maji lə Luwə*

<sup>11</sup> Luwə təji me-maji ləne, ki e gin kaji lə dije pəti ki taga wangi. <sup>12</sup> Me-maji lə Luwə kin ndo-je kadi ji tusi ne ra ki go bəl Luwə ti al, ki ngur ne lə duniyə j-iyə kə. J-iyə kə mba kadi j-isi ki dəje taa dəkagilo ti ki bəne kin me njiyə ti ki go rəbi ti ki dana, ki

təl rə go ndu Luwə ti. <sup>13</sup> Ji rai be taa kadi ji nginai maji ki j-indai meje də ti, kadi ji nginai ndə ki Luwə ləje ki bo, ki nje kaji-je Jəju Kirisi a tēe-n me təba ti ləne. <sup>14</sup> Kirisi ki un rəne adi ki mbata ləje, mba kadi gangi-n dəje ta ne ra ti ki majal pəti. Gangi dəje kadi ji təli dije lie ki kay njay. Dije ki kay njay, ki tingəi bil me ne ra je ti ki maji. <sup>15</sup> E kin ə, e ne ki kadi indo dije, kadi ilə-n dɪngəm mede ti. Təgi kər nɔ dije ki aw-n kin, kadi indangi-n-de ki rə ki tji kati. Ira adi dəw madi kidi al.

### 3

#### *Pa njiyə njé kadi-me je*

<sup>1</sup> Ole me njé kadi-me je kadi ilai dəde gin təgi ti lə ngar je ki njé kəbe je. Kadi təli rəde go ta ti ləde, ningə kadi əi bəsi ta ra ne je ti ki maji maji pəti. <sup>2</sup> Əl-de kadi əli ta ki majal də dəw madi ti al, kadi əi njé ge kəl al, kadi əi njé kilə noji naa ti, kadi dije pəti gəri səl ləm ləm ləde tə. <sup>3</sup> MBata je wa ka, kəte dəje goto, je njé təl rə go ta ti al, ji ndəm rəbi, je gin təgi ti lə ngur darə je, ki koo maji rə je ki dangi dangi. J-isi ta ra me ndul ti ki ta ndingə ne ti, dije mbati je, taa je wa ka ji mbati-naa tə. <sup>4</sup> Nə loki Luwə ki nje kaji-je toji maji ki ndigi ləne ki taga mbata ti lə dije kin ə j-ingə-n kaji. <sup>5</sup> Luwə aji-je ki go rəbi kilə raje je ki dana al, nə e ki go koo kəm-to-ndoo lie e wa. Aji-je ki ta rəbi lə man batəm koji ki sigi, ki ta rəbi lə NDile ki təl-je dije ki sigi ti✧. <sup>6</sup> Luwə buki NDil ki kay njay kin dəje ti ki tae ba, ki takul Jəju Kirisi ki nje kaji-je. <sup>7</sup> Luwə buki NDil ki kay njay dəje ti ki go me-maji lie, mba kadi ɔr-n ta dəje ti. ɔr ta dəje ti kadi ji nginə-n kaji ki to biti ki nɔ ti ki j-ində meje də ti.

✧ 3:5 Jə 3.5

<sup>8</sup> Ta kin ə e ta ki rəjeti. Ningə m-ndigi kadi a dō ti nga, mba kadi dije pəti ki adi mede Luwə, indəi rōde ta ne ra je ti ki maji maji. E kin ə e ne ki maji ki ndae to ti mbata lə dije pəti. <sup>9</sup> Ningə, ta ki naji-naa ti ki to mbə, ki kər gin noji je, ki gangi-naa, ki kəl-naa dō ndu-kun je ti kin, əi ne ki ndade goto, ə maji kadi əsi rəi ngərəngi kə kadide ti<sup>☆</sup>. <sup>10</sup> Dəw ki nje re ki gangi-naa dan njé kaw-naa je ti, maji kadi indər mbie nja kare, indər ki kə joo, ə re oo ta ləi al ningə, səbi kadi əse ngərəngi. <sup>11</sup> Igər maji kadi dəw ki be kin, e dəw ki ndəm rəbi. Ə re nay ki lo ra majal ti ningə, isi gangi ta dō rəne ti e wa.

### *Ta je ki dəbəy ti*

<sup>12</sup> NDō ki m-a m-ilə Artəmasi ə se Tisiki<sup>☆</sup> wa, ə tee rəi ti 6a, kadi j kalangi ire ingəm Nikopolisi ti. Tadō m-ndigi kadi nay kul osi dəm ti Nikopolisi. <sup>13</sup> Maji kadi ində kəmi go Jənasi ti, ki nje gər rəbi gangi ta je əi ki Apolosi<sup>☆</sup> maji. Ira səde dō rəbi mba ti ləde. Ira səde kadi ne madi du-de al. <sup>14</sup> Maji kadi dije ki əi dije ləje, ndoi kaw kəte me ne ra je ti ki maji. Be ə, a gəri lo ra ki dije ki ne to rōde. Ningə, kisi ki dō taa ləde a e kare ki ndangi al tə.

<sup>15</sup> Dije pəti ki əi səm naa ti ne uwəi jii. Uwə jii madije je, ki əi njé kadi-me je.

Kadi me-maji lə Luwə e naa ti səsi pəti. Amen!

---

☆ **3:9** 1Tim 1.4    ☆ **3:12** 2Tim 4.12    ☆ **3:13** Knjk 18.24; 1Kor 16.12

## **KĒLƏ-MĪNDĪ KĪ SĪGĪ**

### **New Testament in Bedjond (CD:bjv:Bedjond)**

copyright © 2011 Wycliffe Bible Translators, Inc.

Language: Bedjond

Translation by: Wycliffe Bible Translators, Inc.

### **Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Bedjond

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2021-11-01

---

PDF generated using Haiola and XeLaTeX on 21 Feb 2024 from source files  
dated 29 Jan 2022  
a4f34a03-c89e-55e0-bc3f-22f7829df823